



ÚDARÁS
CRAOLACHÁIN
NA hÉIREANN

BROADCASTING
AUTHORITY
OF IRELAND

Plean Gníomhaíochta Inscne an BAI

Réamhrá

Tá ról lárnach ag an BAI ó thaobh éagsúlacht agus cothroime a chur chun cinn i dtionscal closamhairc na hÉireann. Ina ról dúbailte mar fhorbróir agus rialtóir na hearnála, bhí an BAI ag obair lena chomhpháirtithe ar feadh roinnt blianta ar shaincheisteanna a bhain le comhionannas inscne.

Ina Ráiteas Straitéise trí bliana a foilsíodh in 2017, ar cheann de na príomhchuspóirí straitéiseacha faoin téama *An Éagsúlacht agus an Iolracht a chur chun cinn* bhí *‘Tírdhreach a chothú sna meáin arb ionadaíoch agus inrochtana d’éagsúlacht sochaí na hÉireann é’*. Toradh luaite don BAI is ea go mbeadh *‘meáin chlosamhairc na hÉireann níos éagsúla i dtaobh a n-ábhair agus iad siúd a bhfuil baint acu ina léiriú’* faoi dheireadh 2019

Chuige sin, d’fhorbair an BAI Plean Gníomhaíochta Inscne, a bhfuil bunús maith aige laistigh den chreat arna sholáthar ag Moladh Choiste Airí Chomhairle na hEorpa do bhallstáit maidir le comhionannas inscne san earnáil chlosamhairc. Ghlac Coiste na nAirí leis an Moladh sin an 27 Meán Fómhair 2017.

Tar éis an Moladh a dhéanamh agus mar aitheantas ar an ngá a bhí le dearcadh comhionannas inscne a chomhtháthú in earnáil chlosamhairc na hÉireann, rachaidh Plean Gníomhaíochta Inscne an BAI i ngleic le ceithre phríomhréimse chun comhionannas inscne níos fearr a chur chun cinn. Is iad sin:

- Bailiú agus foilsiú sonraí
- Tacaíocht do Thaighde
- Forbairt tionscnaimh inscne a spreagadh go himheánach, agus i gcomhar le páirtith leasmhara
- Próisis chuntasachta a fheabhsú, lena n-áirítear monatóireacht agus tuairisciú

Déantar cíoradh breise ar phleananna an BAI faoi na ceithre réimse sin anseo thíos.

1. Bailiú agus foilsiú sonraí

Aithníonn an BAI go bhfuil sonraí atá cothrom le dáta agus cruinn maidir le líon na mban a bhfuil baint acu leis an tionscal closamhairc, na cineálacha ról atá acu agus na deiseanna maoinithe ar a mbíonn rochtain acu gann agus gur deacair na sonraí sin a chruinniú.

Chun dul i ngleic leis an bhfadhb sin, rinne an BAI roinnt athruithe cheana féin ar a phróisis agus ar a nósanna imeachta inmheánacha, de réir mar a bhaineann siad le deiseanna maoinithe arna dtairiscint ag an BAI trína chiste Fuaimne agus Físe go príomha, agus trína shásraí rialála freisin. Mar shampla,

-
- Leasaíodh an fhoirm iarratais le haghaidh Fuaime agus Físe ionas go mbeifear in ann sonraí faoi chúrsaí inscne a bhailiú maidir le ról chruthaitheacha an Léiritheora, an Stiúrthóra agus an Scríbhneora. Caithfidh na hiarratasóirí a bheidh ag cur isteach ar mhaoiniú cuntas a thabhairt ar inscne na dtrí ról chruthaitheacha sin anois ag céim an iarratais.
 - Ní mór do chonraitheoirí Fuaime agus Físe tuairisc a thabhairt anois ar inscne na bpríomhról cruthaitheach (eagarthóir, stiúrthóir grianghrafadóireachta, etc., agus os a gcionn) chun an sciar deiridh íocaíochta a tharraingt anuas.
 - Caitear miondealú maidir le hinscne ar na poist bhainistíochta agus neamhbhainistíochta laistigh de stáisiún a thabhairt san fhaisnéis i dTuairisceáin maidir le Craoltóirí le haghaidh stáisiúin tráchtála cheadúnaithe, agus caitear réimeanna tuarastail a thabhairt freisin
 - Ní mór do chraoltóirí pobail agus iad siúd a bhfuil spéis acu i gceadúnas craolacháin pobail cloí le miondealú inscne 60/40 ar a gcuid bord.

In éineacht leis na próisis thuas, tá an BAI meáite ar na sonraí a bhailíonn sé maidir le comhionannas inscne laistigh den earnáil a fhoilsiú agus a chur ar fáil. Is é a aidhm sonraí trédhearcacha agus cruinne a thabhairt maidir le líon na mban atá rannpháirteach san earnáil, na poist atá ag na mná sin, struchtúir phá laistigh den earnáil agus cibé an bhfuil cothroime inscne i bpoist chinnteoireachta sa tionscal nó nach bhfuil.

2. Tacaíocht do Thaighde

Tá an BAI meáite ar thacaíocht a thabhairt do thaighde a bhaineann go sonrach le hinscne agus tabhairt faoin taighde sin san earnáil chlosamhairc.

Go sonrach, agus ag teacht le Moladh Chomhairle na hEorpa, féachfaidh an BAI le taighde gníomhach a chur chun cinn maidir le comhionannas inscne san earnáil chlosamhairc, go háirithe taighde a bhaineann le comhionannas rochtana do mhná ar an tionscal – lena n-áirítear ról cheannaireachta, ionadaíocht ban ar an scáileán agus ar an aer, bacainní ar rannpháirtíocht agus dálaí ginearálta oibre. Ina theannta sin, déanfaidh an BAI, nuair is iomchuí, poiblíocht rialta ar thorthaí tionscnamh den sórt sin.

Eagróidh an BAI díospóireachtaí freisin d'fhonn beartas agus reachtaíocht a fheabhsú sa réimse seo, agus beidh sé rannpháirteach sna díospóireachtaí sin.

Beidh an BAI ag lorg comhpháirtíochtaí le comhlachtaí eile ach déanfaidh sé taighde neamhspleách freisin de réir mar is gá.

3. Forbairt tionscnaimh inscne a spreagadh go himmheánach, agus i gcomhar le páirtithe leasmhara

Thacaigh an BAI le tionscnaimh foghlama agus forbartha leis an earnáil le blianta fada anuas, go príomha trína Bheartas Forbartha Earnála agus pleananna bliantúla. Agus é ag féachaint le forbairt tionscnaimh inscne a spreagadh lena pháirtithe leasmhara, leanfaidh an BAI ag cur feabhais ar a chlár forbartha earnála agus cothóidh sé deiseanna cruthaitheacha freisin arna dtairiscint ag na cláir maoinithe a reáchtálann sé chun tacú le tionscnaimh inscne. Áireofar leis na samplaí:

- Tiomantas do leanúint ag obair ar thionscnaimh oiliúna agus forbartha a sheachadadh a chuireann ar chumas ban a gcuid ionadaíochta sna meáin a mhéadú
- Fócas ar na deiseanna cruthaitheacha ó Fhuaim agus Fís, ó thaobh dul i ngleic le saincheisteanna inscne ar an scáileán agus lasmuigh de. D'áireofaí leis na samplaí den chaoi a bhféadfaí é sin a sheachadadh:
 - Oiliúint maidir le feasacht inscne a chur ar fáil do lucht féachana éagsúla den BAI: e.g. an fhoireann, measúnóirí seachtracha Fuaim agus Físe, comhaltaí Boird. I gcás páirtithe leasmhara seachtracha, féachaint le hoiliúint den sórt sin a sheachadadh mar chuid de thionscnaimh maoinithe líonra.
 - Machnamh a dhéanamh ar bhabhta speisialta d'Fhuaim agus Fís a reáchtáil ar Scéalta Ban. D'iarrfaí tionscaddail thar gach seánra chun scéalta ban a insint leis sin. Tá an BAI den tuairim go dtabharfadh cur chuige mar sin deis chun an scéal a leathnú amach, carachtair nua a chur i láthair, idir chinn a bheadh fíor agus chinn bunaithe ar fhicsean do lucht éisteachta agus féachana na hÉireann, agus scéalta difriúla agus guthanna difriúla a chur chun cinn tríd is tríd.

4. Próisis chuntasachta a fheabhsú

Tacaíonn an BAI leis an tuairim a tugadh sa Mholadh ó Chomhairle na hEorpa go bhfuil ról lárnach ag comhionannas inscne laistigh den earnáil chlosamhairc mar thoisc chumasúcháin le haghaidh daonlathas atá ag feidhmiú go hiomlán agus chun sult a bhaint as cearta an duine. Is féidir feabhas iomlán a chur ar éagsúlacht inscne trí chuntasacht. Dá bhrí sin, beidh an BAI freagrach tríd an méid seo a leanas:

- Plean Gníomhaíochta Inscne an BAI a fhoilsiú, ag teacht leis an Moladh ó Chomhairle na hEorpa a chumasóidh tuairisciú, foilsiú agus monatóireacht rialta ar thionscnaimh agus gníomhartha a chuirtear i gcrích chun comhionannas inscne a chur chun cinn san earnáil.

-
- Cuirfear tionscnaimh cosúil leo sin a bhfuil cuntas orthu i mír 3 thuas chun cinn, foilseofar iad agus déanfar measúnú orthu i gcomhair ratha.
 - Lorgóidh an BAI deiseanna comhpháirtíochta le dreamanna tábhachtacha eile cosúil le comhlachtaí poiblí eile, maoinitheoirí eile, craoltóirí agus comhlachtaí ionadaíochacha eile d'fhonn cuntasacht a fheabhsú tuilleadh ar fud an tionscail.
 - Áireoidh an BAI measúnú ar chur i bhfeidhm agus ar éifeachtacht a Phlean Inscne laistigh dá Thuarascáil Bhliantúil.

